

NOTTE 'E LUNA-- NOTTE 'E INCANTU

Su sole ch'est pag'ora tramontadu  
a s'interrighinada abbrazzos dende  
e d'est sa luna in su monte ispuntende,  
hat su monte e i s'adde illuminadu.

Est un'incantu, sa notte est serena,  
umidende est sos fenos su lentore,  
fattu 'e s'ama cantende est su pastore,  
paret sa notte de grascias piena.

In su tottu frimmadu s'est su 'entu,  
non est s'aera de nues coberta,  
sa furia est passada 'e sa tempesta,  
est torrende dogn'animu cuntentu.

Sun cantende 'e sa notte sos puzzones,  
s'annunziu sun dende 'e notte bella,  
lughede in firmamentu dogn'istella,  
tranquillas riposana sas pessones.

De sos puzzones su cantu amorusu  
a boghe 'oghe cantende l'indurana,  
si godini 'e sa notte e augurana  
a tottu, a tottu su bonu reposu.

E sighende sa luna lughe a dare  
cun su sou costante contivizzu,  
cun sas istellas parede in passizzu  
e cantu durat notte 'istana umpare.

E nè s'intendet cantare s'istria  
che medas nottes chi faghet paura,  
in festa paret totta sa natura,  
notte 'e incantu totta 'e poesia.

Sa luna, a su runaghe sempre amiga  
chi pro seculos l'hat illuminadu,  
ischidi 'e su runaghe s'operadu  
testimonia segreta 'e s'era antiga.

Oh! Cantu est bella sa serenidade,  
non in nottes serenas solamente,  
ma 'e pius chi siada in sa zente  
pro mezzus vida 'e tranquillidade.

Sa luna a dare lughe non suspendede,  
pro cantu durat notte a perun'ora,  
fin'a dare s'abbrazzu a s'aurora  
ch'in avreschida noa lughe azzendede.

GIOVAN GIACOMO FADDA  
THIESI